



Yvonne Gienal – ina artista engaschada

L'artista Yvonne Gienal viva en in ambient rumantsch e dovra il rumantsch tant sco mo pussaivel.

6



Sanaziun da vias en Surmeir

Nus dain ina survista davart las sanaziuns da vias en Surmeir e cunzunt la soluziun per Mulegns.

13

südostschweiz

LA QUOTIDIANA

Redacziun: Via Sommerau 32, 7007 Cuir, tel. 081 255 57 10, redacziun@laquotidiana.ch



Annalisa Giger, l'ustiera sursilvana e vicepresidenta da Gastro Grischun, cun Franz Sepp Caluori, il president da l'uniun.

FOTO G. N. STGIER

Ina Sursilvana per Gastro Suisse

DA GION NUTEGN STGIER / ANR

■ A Müstair èn sa radunads ier ils delegads da las secziuns da Gastro Grischun per salvar la radunanza annuala. Franz Sepp Caluori è vegni reelegi sco president. Annalisa Giger candidescha sco commembra per la supranza da Gastro Suisse. En preschientscha da blera prominenzia politica han ils ustiers grischuns giudi l'ospitalitad da lur collegas da la Val Müstair. Il recept da success sa numna er en l'avignir qualitat ed anc ina giada qualitat, ha ditg Franz Sepp Caluori, Cuir, il president dals 1000 ustiers grischuns. A lunga vista sa-

ja la strategia da pretchs da singulas pendicularas da noss chantun da grond donn per l'entir turissem, ha ditg il deputà ed ustier. Cun bler applaus han ils preschents nominà Annalisa Giger, Mustér, la vicepresidenta da Gastro Grischun, sco candidata per la supranza da l'uniun tetgala Gastro Suisse. La radunanza nazionala ha lieu il mais da matg a Locarno. Da nov en supranza da Gastro Grischun èn vegnidas elegidas Fabia Caduff, Sursaiusa ed Annalies Biäsch, Tavau. Sa retratga sco supstanta e quai s'entend s'onn è Tamara Henderson, Tavau.

> PAGINA 2



Dumeng Schreich examinond la crappa dal grip dal Munt Son Gion/Reziauta sur Seglias en Tumleastga.

FOTO R. SCHILLING

Danunder è la crappa e co vegn ella numnada?

■ (anr/bt) La crappa enturn il Pez Bavreg (Piz Beverin), surtut en Val Schons, è zunt variada ed interessanta, surtut per via da sia derivanza. En pliras contribuziuns per LQ s'occupa il geolog Dumeng Schreich da Masein cun la furnaziun da questa crappa, lur cumposiziun e lur nums. «En l'intschess dal Bavreg chattain nus crappa fig diversa ch'è oriundamain vegnida furnada tut insanua auter», cumenza Dumeng Schreich sias explicaziuns. «D'ina vart èn quai sediments, depositads en mars da

diversa profunditad. Da l'autra vart avain nus er crappa cristallina ch'è vegnida or dal mantè da la terra. Quai fa che nus avain sin paucs kilometers in'enorma variaziun da crappa che n'ha da fat nagut l'ina cun l'autra.» A l'entschatta da sia preschentaziun stat alura er il crap cristallin, il crap pli vegl da la regiun. Ma la gronda part da la crappa deriva d'antieriurs fons da mars ch'èn vegnids purtads sisum las muntognas entras la faudaziun da las Alps.


> PAGINA 10

Donns registrai tenor criteris

Concentraziuns dalla selvaschina meinan a donns vid plantas e regiuvaziuns

DA HANS HUONDER / ANR

■ Novissimamein vegnan ils donns caschunai dalla selvaschina egl uaul registrai tenor criteris units egl entir cantun Grischun. Emprems conclusiuns sa igl uffeci d'ual e prighels dalla natira trer en rodund in onn. Ina gronda populaziun dalla selvaschina drova bia vivonda. Ina part da quella catta ella era egl uaul. En unviars cun ina cozza da neiv grossa e serrada sur pli lung temps ein plantas per part la suletta fontauna da nutriment. Meinsvart vegnan las pontas denton murdidadas talmein ch'ellas mieran lu giu pli tard. Per saver documentar ils donns che la selvaschina caschuna egl uaul registrescha igl Uffeci d'ual e prighels dalla natira dil cantun Grischun sistematicamein ils donns caschunai. Sco quei che Marco Vanoni, menader dil sectur ecologia forestala tiegl uffeci, di succeda la registraziun entras ils selviculturs da revier ed inschigniers forestals ni era inschigniers forestals libers sin incarica digl uffeci. Per saver giudicar e cumparegliar



En loghens cun concentraziuns dalla selvaschina ein ils donns vid las plantas buca da surveser.

MAD

la dimensiun dils donns vegnan las controllas fatgas la primavera mingamai els medems loghens. Avon in onn, suenter la dumbraziun da tscharvas 2017, ha la Sel-

va – l'Associaziun dils possessurs d'ual dil cantun Grischun – pretendiu ina reducziun persistenta dalla populaziun da tscharvas. Ina reducziun moderata sco prevedida il

mument ella planisaziun da tscha seigi buca sufficienta a liung vesta.

> PAGINA 3

Concert da l'Orchester d'Engiadina a Scuol

■ (anr/bcs) D'incuort ha gnü lö illa baselgia refuormada da Scuol ün da trais concerts da l'Orchester d'Engiadina. Ingon po quel festagiar seis 50avel giubileum. L'orchester vain manà actualmaing e daspö l'on 2000 da Gyula Petendi chi lavura sco magister da cello pellas scoulas da musica da l'Engiadina. Pels concerts da giubileum vaivan ils respunsabels invidà sco solist e diri-

gent a Domenic Janett. Il concert es gnü preschantà in trais parts cun instrumaints a corda. La prüma part ün medley cun chanzuns popularas svizras, la seguonda part cul titel «Gruss aus der Schweiz» e la terza part cun cumposiziuns da Janett, sunà a la clarinetta ed accompagnadas da l'orchester.

> PAGINA 9



Domenic Janett e Gyula Petendi han dirigi l'Orchester d'Engiadina.

FOTO B. STECHER

Chattà üna successiun pel Lolipop a Scuol

■ (anr/afi) Avant 25 ons d'eira Yvonne Mayer da Scuol in tschercha d'üna località per seis atelier. Sia paschiun sun sper las culuors eir la moda per uffants. Il Center Augustin vaiv'la chattà ün local chi d'eira per seis intent oriund massa grond. «Per üna butia d'eira però üna grondezza idea ed uschè n'haja decis da drivir üna butia da büschmainta per uffants da nolla fin dusesch ons»,

s'algorda Yvonne Mayer. Qua ch'ella ragiundscha bainbod l'età da pensiun ha'la tscherchà üna successiun per seis affar. «Eu na grond plaschair ch'eu poss surdar mia butia a Marion Egler, üna persuna ch'eu cugnusch e chi cuntinuarà cun mia filosofia.» Egler surpiglia per la fin da quist mais il Lolipop immez Scuol.

> PAGINA 9



Il Lolipop a Scuol va la fin da quist mais in novs mans.

FOTO A. FILLI



Servetsch d'abunents e da distribuziun: tel. 0844 226 226 mail: abo@somedia.ch